

**Meeqqat atuarfianni angajullerni inuussutissarsiutitut sammiveqartut atuartitsissutitut
neqerooruteqarsinnaalernissamik periarfissiisinnaaneq pillugu Naalakkersuisut
UKA2023 nallertinnagu
nalunaarusioqqullugit aalajangiiffigisassatut siunnersuut**

Inatsisartunut ilaasortamit Aqqalu C. Jerimiassenimit, Atassut, saqqummiunneqartooq

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutit aappassaaneerpeqarnerannut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Najaaraq Møller, Siumut
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Eqaluk Høegh, Inuit Ataqatigiit

UKA2022-mi ulloq 27. oktober 2022 siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Meeqqat atuarfianni angajullerni inuussutissarsiutitut sammiveqartut atuartitsissutitut neqerooruteqarsinnaalernissamik periarfissiisinnaaneq pillugu siunnersuummi Naalakkersuisut nalunaarusioqquneqarput. Meeqqat atuarfiini meeqqat inuusuttullu akornanni inuussutissarsiortuuneq pillugu ilisimasaqarnerulernissat siunnersuutip siunertaraa. Taamatut ilisimasaqarnerup kinguaariit tulliuuttut siunissami inuussutissarsiortutut namminersortutut ingerlarusulernissaat siunnersuuteqartumit anguniarneqarpoq.

Siunnersuutip Inatsisartuni siullermeerneqarnera

Siullermeerinninnermi siunnersuut tigulluarneqarpoq. Ilinniagaqarnerup inuiaqatigiinnut pingaaruteqassusaa pillugu isumaqatigiittoqarluarpoq, kiisalu inuusuttut amerlanerusut

meeqqat atuarfiat naammassigaangamikku toqqaannaq ilinniagaqarlutik ingerlaqqittalernissaat sulissutigineqartariaqartoq. Inuussutissarsiorluni namminersortuni sulisuusut amerlisarneqarnissaata pingaaruteqassusaa pillugu aamma isumaqatigiittoqarluarpoq. Susasaqarfiup iluani suliniutaareersunut siunnersuut ilanngunneqarsinnaanersoq misissorneqassasoq ataatsimiititaliamut kaammattuutigineqarpoq, kiisalu eqqartorneqaqullugu inuussutissarsiornermut ilinniarfiit meeqqat atuarfiini qanoq iliornikkut sammineqarnerulersinnaanersut.

Ataatsimiititaliap siunnersuummik suliarinninnera

Inuusuttut ilinniagaqartarnissaat taamaalillutillu sulisartunngornissaasa qulakkeerneqarnissaat pillugu isumaqatigiittoqarluarpoq ataatsimiititaliamit maluginiarneqarpoq. Tamassuma suli annertuumik unammillernartuunissaa ataatsimiititaliamit ilisimaneqarpoq taamaattumillu unammilligassap nuna tamakkerlugu najukkamilu suliarineqartussanngortinneqarnissaa pingaartinneqarpoq.

Siunnersuut ajornartorsiuteqalersitsivoq – sulilertartut ikippallaartut, ilutigisaanillu namminersorlutik inuussutissarsiorluni sulisartut amerlanerusussaagaluartut. Ilutigisaanillu siunnersuummi tikkuunneqarluni ajornartorsiummut tassunga aaqqiissutaasusaaq tassaasoq inuussutissarsiornermut sammiveqartut meeqqat atuarfiini atuartsissutaasalernissaat.

Inuussutissarsiornermut sammiviit sorliit atuartsissutissatut kissaatigineqarnersut, tassunga ilanngullugu inuussutissarsiornermut sammiviit/atuartsissutit assigiinngitsut arlaqassanersut, imaluunniit siunertaanersoq atuartsissuummi ukiup ataatsip ingerlanerani inuussutissarsiutit assigiinngitsut misilittarneqarsinnaallutik, siunnersuummi eqqaaneqanngitsut ataatsimiititaliamit maluginiarneqarpoq. Tamatuma saniatigut atuartsissutit inuussutissarsiornermut sammivillit atuartsissutit toqqarneqarsinnaasutut ilanngunneqassanersut imaluunniit atuartsissutaareersunit akunnernik peersilluni tassunga akunnernik atugassanngortitsisoqassanersoq siunnersuummi allaqqanngilaq.

Meeqqat atuarfianni angajullerni inuussutissarsiutinut sammiveqartut atuartsissutit neqerooruteqarsinnaalernissamik periarfissiisinnaaneq kissaatigineqartutuut sunniuteqassanersoq ataatsimiititaliamut ersarluppoq. Taamaattumik Naalakkersuisut akissuteqaataanni nassuiaatigineqartoq malillugu piffissami matumani najukkami nunalu tamakkerlugu suliniutinik arlalinnik aallartitsisoqareersoq, atuartsissutinut inuussutissarsiornermut sammivilinnut assigiinngitsunut atuartsinermi akunnernik atuinissaq qanoq pissusissamisoortigissanersoq ilisimaneqanngilaq. Tamatuma saniatigut 2023-mi ilinniartitaanermit periusissaq nutaaq aallartinneqassasoq ataatsimiititaliamit paasineqarpoq, tassani ilinniartitaanerup iluani qaffasissutsit assigiinngitsut tamarmik akornanni ataqatigiinneq ilaatigut nukittorsarneqassaaq.

Taamaattorli suliniutaasut assigiinngitsut akornanni suleqatigiittoqannginnera ataqatigiissaarisooqannginneralu ataatsimiititaliamit maluginiarneqarpoq. Suleqatigiittoqannginnera peqqutaalluni meeqqat atuarfiini suliniutit pitsaanerpaamik pissarsiaqarfigineqarsinnaanngillat.

Ataatsimiititaliap inassuteqaatai


Ataatsimiititaliaq isumaqatigiittoq ima ittumik allannguutissatut siunnersuummik akuerisassanngorlugu saqqummiussivoq:

“Namminersortut suliniuteqartut pisortallu susassaarfii meeqqat atuarfianni suliffeqarneq pillugu ilisimasaniq siuarsaanissamat tunngasunik suliaqartut akornanni suleqatigiinnermut nukittorsaataasussamik, ataatsimoorussamik iliuusissatut pilersaarummik suliaqarnissaq pillugu kommunit oqaloqatigineqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Suliniutit ingerlareersut assigiinngitsut qanoq pitsaanerpaamik ataqatigiissarneqarsinnaanersut, inuussutissarsiornermut ilinniartitaanermullu immikkoortortat akimorlugit sulinissaq kiisalu taakkua siunissami ilinniartitaaneq pillugu iliuusissamat ilanngunneqarnissaat iliuusissatut pilersaarummi ukkatarineqassaaq.”

Taama oqaaseqarluni isumaliutissiissummilu allasimasutut paasinnilluni ataatsimiititaliap siunnersuut aappasaaniigassanngortippaa.



Doris Jakobsen Jensen
Siulittaasoq



Nivi Olsen
Siulittaasup tullia



Eqaaluk Høegh



Najaaraq Møller



Harald Bianco